

Dithero tsa Tirelano mo Kutlwanong

Thero ka Sontaga wa 04 mo sebakeng sa Adfente, e le ka 18. 12. 201104/2012

Mo leineng la Modimo o e leng Rara le Morwa le Mowa o o Boitshepo!

1. Sefela sa 46 - 44/46
2. Thapelo: *Modimo wa ditsholofetso, re atamela mo go wena kajeno, Rara, re ipolela melato ya rona, re tlodile ditaolo tsa gago, ra ikepa. O setse o re beditse, go a lekana. Ka moo re kopa gore o re romele Mowa wa gago gore o bofe dintho tsa rona tse di rothang mo dipelong tsa rona. O re tiise ka Lefoko la gago, o re itshwarele, o dirafatse tsholofetso ya gago, re tle re dirafatse ditsholofetso tsa rona tsa go go direla ka ene Jesu Keresete. Amen.*
3. Epistolo ka fa thulaganyong ya 2 e kwadilwe mo go Bafilipi 4:4-7;
4. Efangele ka fa thulaganyong ya 1 e kwadilwe mo go Luka 1:39-56.
5. A go ipolelwe tumelo ya bokeresete!
6. Sefela sa 49 - 48/50
7. Thapelo ya mmadi wa thero.
8. Epistolo ka fa thulaganyong ya 4 e kwadilwe mo go 2 Bakorinthe 1:18-22, e re: *"Modimo o boikanyo, o ka supa gore lefoko le re le lo boleletseng ga le tlhakanye Ee le Nyaa; gonne Jesu Keresete, Morwa Modimo, yo re mo rerileng mo go lona, e bong nna le Silefano le Timotheo, ga a ka a nna Ee le Nyaa, mme mo go ene go ntse go le Ee; gonne le fa go ka nna dipolelelo-pele tsa Modimo di le kae, di Ee mo go ene; ke ka moo re reng: Amen ka ene go galaletsa Modimo. Mme ene yo o re tlhomamisang mmogo le lona mo go Keresete yo o re tloditseng ke Modimo, o e bileng o re tshwaile, wa re naya sebeeelo sa Mowa mo dipelong tsa rona." Amen.*

Thero: Barategi mo go Jesu Keresete, kajeno ke Sontaga wa bofelo, re ise re dire moletlo o mogolo wa go gopola botsalo jwa ga Morwa Modimo, e bong Jesu yo o tsetsweng go nna motho. E bile ga se malatsi a le mantsi go ise go fele ngwaga. Tota ke a ipolela gore ba le bantsi ba rona ba na le dintho tse di sa foleng ka botlhofo. Ke tse di leng teng ka ntlha ya dipitlagano tsa go bolaelana fela. Rona ba re sa ntseng re le teng, re tshwanetse go leboga Modimo o o re femetseng, le fa re le dikhutshane, gongwe batlholagadi, gongwe baswelwa, le fa re robala mo dikgweng, re ipolele, re re: A tlotlo e nne mo Modimong kwa magodimong, le kagiso mo lefatsheng, le boitumelo mo bathong! Modimo o re o direlang

ke o o tshelang, ke o o utlwang dilelo tsa rona le dithapelo tsa rona. Ka moo a re rapeleng, re se lape!

Mo Epistolong ya kajeno re bona Paulo a kwalela phuthego ya kwa Korinthe, a e bolelela gore Modimo o boikanyo, ga o fetoge. E ne e le ona maabane, e ntse e le ona kajeno, e tla nna e le ona go ya bosakhutleng. Ka moo a re utlweng thuto ya kajeno, e e reng: Morena o boikanyo mo go ba ba o direlang. Ke se re se bonang go tswa mo tshimologong, mo tshimong ya Etene, motho wa ntlha a sena go wela mo boleong, a tshwanelwa ke go swela ruri. Modimo wa mo direla ka bopelotlhomogi, wa solofetsa ngwana wa mosadi, a tle, a tšhwetle tlhogo ya noga. Ke gore ga solofediwa gore Jesu a tle, a fenywe Satane, botlhe ba ba dumelang mo go ene ba pholosiwe. Tota Jesu o tlele mo lefatsheng, a rerela batho Efangele gore ba tlihabologe, ba dumele gore nako e dirafaditswe. Bontsi jwa ba ba mo utlwileng ba dumela mo go ene, jaaka le rona re dumela mo go ene. Le fa go ntse jalo, go ne go na le Bajuta ba ba neng ba ganetsa ditiro tsa ga Jesu, ba sa dumele gore Jesu ke yo o solofeditsweng ke Modimo gore o tla tsalwa ke lekgarebe. Ka moo ba ne ba khutla ka go bapolela Jesu mo sefapaanong. Madi a gagwe ke a a re itshekisang boleo jotlhe. Ka moo Beibele e re: Fa re ipolela maleo a rona, Modimo o ikanyegile, o siame, o a re itshwarela.

Paulo o bolelela phuthego ya kwa Korinthe gore Jesu yo a mo rerang mmogo le Silefano le Timotheo ke Morwa Modimo, phuthego e tlhokomele gore e eme mo boammaaruring, ka Jesu e le ene Ee wa Modimo. Go ntse fela jalo le mo go rona kajeno ba re rerang, re rera Jesu yo o neng a rerwa ke baapostolo ba bogologolo. Ka moo, bomorwa-Rre, latlhang dipelaelo, lo dirafatse ditsholofetso tse Modimo o di dirileng mo go rona. Modimo o lopa mo go rona ka metlha gore re ikanyege. O a rata gore re eme mo boammaaruring, gonne Lefoko la ona ke la boammaaruri. Ene Jesu ke tsela le boammaaruri le botshelo. Fa re leba palo ya batho ba re nang nabo mo dikwalong tsa diphuthego tsa rona, re lemoga gore re na le ba le bantsi, mme fa o rata go bonana le bone le go bua le bone, o tla gakgamala fela, fa ba le bantsi ba sa tihole ba le teng, gongwe o ba bona gore ba direla teng koo mo kerekeng, mme kwa gae ba direla se sengwe. O ka re: Phuthego e kgaogane mo gare. Bangwe ba gopola gore ba botoka go feta ba bangwe. Tse tsotlhe tseo di teng ka ntlha ya go belaela, le go sa eme mo boammaaruring jwa go ikanya Morena wa rona Jesu Keresete. Ditshika di a senyega, batho ba ikepa mo Modimong, ba lebala ka pele ditsholofetso tse ba di dirileng mo kolobetsong, le mo tlhomamisong, mo nyadisong, le tse dingwe tse di ntseng jalo. Ka moo Modimo ga o dumele ditsholofetso tse ke di dirileng fa pele ga phuthego, gongwe tse o di dirileng. O tla tlola ditaolo tsa Modimo go ya leng?

Tlhokomela gore o se itsietse ka gore Jesu o diegile. Le fa go ntse jalo, o sa ntse a re fa phatlha gore re tlabologe, re boele mo go ene ka boikokobetso jo bogolo. Ke fa a tla rata tota go re amogela sešwa. Jesu o rata gore re latlhele matshwenyego otlhe a rona mo go ene. Go tla re thusang, fa re tsena mo matlong ya go mo direla, re ntse re sikare merwalo ya rona, re sa e latlhele mo go ene, mme re leke fela go e rwala ka rosi, re tle re boele mo magaeng a rona, re ntse re e rwele, mme tota-tota e ka bo e le tshwanelo gore re e latlhele mo Moreneng wa barena. Letswalo le bolaya motho, fa a sa rate go thuswa ke Jesu. Bgolo a re gopoleng gore Jesu o rata go tlosa merwalo yotlhe le letswalo lotlhe mo go rona.

Kana Modimo o re tloditse rona ba re leng bana ba ona ka Mowa o o Boitshepo, wa re tshwaya ka lotshwao lwa gore re kgaogane le bone ba ba sa dumeleng, gore ka tsamao e e boitshepo e e sa nyatsegeng fa pele ga batho, Modimo o galalediwe. Tiro eo ya go gogelwa mo Modimong re e direlwe ke Mowa o o Boitshepo. Fa re ka leka ka borona, re tla palelwa fela. Ke gona go bonalang gore moapostolo o rata go budulola matlho a phuthago ya kwa Korinthe gore e lemoge sentle gore Mowa o o Boitshepo o teng, o dira mo dipelong tsa badumedi, o budulola matlho a bone gore ba tloge mo lefifing, ba tlabologe mo leseding, ba tloge mo thateng ya ga Sathane, ba tlabologe mo Modimong. Ke gore ba hutsafalele maleo a bone, ba amogele boitshwarelo ka tumelo. Ke yona taletso le mo go rona kajeno gore re kope Mowa o o sedimosang gore o nne le manno mo dipelong tsa rona, re tle re lemoge ka ona diphoso tsa rona, re tle re kope bopelotlhomogi le boitshwarelo mo Modimong ka Jesu.

Ke gona re lemogang gore ke se segolo se Modimo o se re rulaganyeditseng re ntse re le mo lefatsheng mo sebakeng se re tshelang mo go sona, jaaka o naya ka metlha Lefoko la ona, o re tiisa mo tumelong mo dipakeng tsa tlalelo. A re o galaletseng, re go boke, gonne o na le maikaelelo a mantle ka rona, badumedi. O rata gore lefatshe le ithute mo go rona botshelo jo e leng jona, jwa go ruana le Modimo. Nako ya boitumelo e atametse ya gore re gopole gore Jesu a nna nama, a aga mo gare ga rona, a re ruta tsela e re tshwanetseng go tsamaya ka yona. Ka moo re tla gopola gore Modimo ditsholofetso tsa ona o a di dirafatsa. Jesu yo o solofeditsweng o tsetswe go nna motho. A go godisiwe, go medisiwe lorato lo logolo lo lwa ga Rraetsho mo gare ga batho, ba lemoge botlhe gore Rara o re rometse Morwawe gore a swele maleo a rona, e le sengwe se re sa se tshwanelwang, mme se dirafetse ka ntlha ya bopelotlhomogi jwa Modimo gore re pholosiwe. Ka moo a re supeng ka ga gagwe, re na le boikanyo jo bošwa jwa go ikanya gore Modimo o re fa sebeeelo se e leng Mowa wa ona mo dipelong tsa rona gore o tsosetse lorato lo lo bonalang mo ngwageng o mošwa, e le lorato lo lo bonalang gore lo tshela mo lefatsheng.

A tlotlo e nne mo go ene ka metlha, a re fetisetse mo ngwageng o mošwa re itshekisitswe ka madi a gagwe, re le dibopiwa tse dintšhwa, re tsamaye ka tsamao e e fetogileng tota, e nne e e mo go Keresete Jesu. Amen.

Thapelo: *Morena, re lebogela Lefoko la gago. O re tiise ka lona gore re itshokele tsotlhe tse di tshwenyang, le ditlalelo tsotlhe tse re kopanang le tsona. O re tshegofatse ka ditshegofatso tsa gago jaanong le ka bosakhutleng ka ene Jesu Keresete, Morena Morepholosi. Amen.*

9. Thapelo ya Morena: Rara wa rona yo o mo legodimong ...

10. Sefela sa - 47/49

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke M. R. Lushaba, ka ngwaga wa 1994. 1999; 2005
Kgatiso le go rongwa ga dithero tseo go tshegediwa ke kopano e e bidiwang The Lutheran Heritage
Foundation.